

Mia nona

Alora. Mia nona. Mia nona ze una de quele none moderne. No stè capir mal - no stago dizendo che la se fa i selfie ogni do per tre o che la va in giro con la minigona e i tachi in tela casa de risposo (o, dito al istriana, casa del vecio) per cercarse un nono che la porti spaso. No sicuro! Ma no la ze nianca cusì moderna de doperar Facebook. Mia nona ze una via de mezo.

La ze sai fiera del suo telefonin. Poco tempo fa ghe go fato WhatsApp (o, come la pronuncia ela, el "wolzap"). Mai sbaglio più grande ze stado fato! Le prime due settimane: cuori, bacini e abbraci. Tuto bem, tuto bom, fina che una dele sue amiche ghe manda una de quele foto del bongiorno. Gavè presente? Quele foto fate a collage sul computer con briliantini, fiorelini e bestie varie. De là in avanti, se salvi chi pol! Ogni santa matina (soprattutto de sabato e domenica), ale oto e un quarto puntualmente me riva uno de sti mesagi. "Ma che problema ze?" dirè voi. El problema ze che per fin la se emoziona, opur la sciopa de rider per fotografie compagne che no ze niente de rider! Ma no ve go ancora dito perché ale oto e un quarto. Eh, cari mii, perché ale 8 ze Paolo Fox che ghe fa l'oroscopo e, fidesse de mi, se no ze come disi Paolo (o, soranominado de ela "Il mio Foxic") no va ben! Ma caro Paolo mio, mi me domando, ti ne devi per forza dar le stele in tel oroscopo? Ogni giorno che tornemo casa per pranzo mi e mia mama, le robe che la ne ga de domandar ze: gavè magnado? Se sì, quando? Come jera scola?

Subito dopo, la ne devi avisar de quante stele ne ga dado suo Foxic, ma che no ve digo! Un mese fa circa jero andata in gita e un giorno prima, ti la senti: "Sta atenta! Foxic me ga dito che ti devi star atenta e pensar con la tua testa! Me racomando: se no ti se senti de far qualcosa no farla!". Ma che gavesivo visto quanta covinzion e preocupazion finché la parlava: de sciopar de rider.

Sempre quando mi e mia mama tornemo casa per pranzo, la se devi anca lamentar perché la sera prima la jera fora con le amiche: e sta qua la se ga ingrasado, e el suocero del nipote del cugin dela zia del fio dela paruchiera dela vicina de casa, el se sposerà; e quela no la se ga rivado operar (questa frase finisi speso con bestemie riferide ai ospedai che me limiterò a no scriver per no eser volgare); e el fio de una se ga trasferido e il fio de quela altra se ga divorziado e cusì vanti fina de sera.

L'ano scoso la se ga iscrito ala associazion dei pensionati de Citanova. Jera in programa una gita a Laktaši 8in Bosnia, me par). In verità jera restadi ancora pochi posti e poco tempo per prenotarse. Pensè che la ga rinunciado? E no! Anche se no jera sai posti la ga rivado andar

come disesimo noi "preko veze". Cosa che no la se ga divertido! La ze andata per dieze girni: che paze che jera! Ma mi e mia mama jerimo consapevoli che, visto che la jera in gita per cusì tanto, quando la saria tornada la ne gavesi contado tuto, e digo proprio tuto, dela gita: come ghe jera, come no ghe jera, cos la ga magnado, chi la ga incontrado, quando la se ga sveiado, come jera el magnar, come jera el personal, e la camera, e come la ga balà, e come la ga dormì... e altre mile robe che, per un comune essere umano, ze assolutamente superficiali, ma per mia nona ze fondamentali. E in più, pochi mesi prima, la gaveva ciapado un smartphone. No ve stago dir quante foto che gavemo dovuto vardar mi e mia mama, de tuto e tuti, de chi e de cosa che jera. Mai mejo. Ma mia mama la me ga insegnado una tatica infalibile in questi cazi: "sorrìdi e annuisci." E devo dirve che se se trovè in una situazion simile, sta tatica funziona!

Ma ala fine, anche se la sa eser "logorroica" de morir, noiosa con l'oroscopo e lamentosa dei altri, son fiera de ela perché la ze una dona forte, sagia e madura. Anche se a volte la se impapina ghe vojo ben lo steso perché la ze unica e in fondo la ze verta ala modernità.